

Na comunanza che empèra

L'é stat portà dant l nef projet pilot de bilinguism envià via te la pruma classes de la scola populèra de Poza e Soraga



I scoles de Soraga e Poza à ciantà per ladin tedant ai esperc, autoritèdes, insegnanc e genitores.

Scola - "Na comunanza che empèra" l'é l titol del projet de bilinguism che con chest nef an de scola é jit en doura te la pruma classes de la scola populèra de Poza e de Soraga. N projet pilot, n muie ambizios e de calità, che é stat prejentà ofizialmenter enstadi te Sorastanza de la Scola de Fascia a l'assessora provinzia a l'istruzion Marta Dalmaso, la Procuradora Cristina Donei, autoritèdes, insegnanc e genitores.

"L ladin l'é n lengaz che à la medema degnità del talian o del todesch e l'ingleis - à dit la

Sorastanta Mirella Florian te sie intervent de salut - l pel trasmetter contegnui a la pèr di etres. Nosc obietif l'é la realisazion de na situazion de insegnament paritarie, olache l ladin vegn durà desche lengaz veicolèr, tant te clasc che te ogne moment de sozialisazion delaite de la scola. Sion segures che con chest projet l ladin ruarà amò te più te duta la families e l podarà esser emparà dessema ai fies."

La Procuradora Donei à sottrissà l'emportanza de la cognoscenza de più lengaz e l'à jontà che "un di

obietives prinzipai de chest nef Comun General sarà chel de fèr comunanza, l lengaz ne lea l'un co l'auter e l ne porta a renforzèr noscia cultura e noscia storia, se jiron a perder nosc lengaz, perdaron ence noscia cultura."

Protagonisc de chest moment ofizial de prejentazion l'é stat encomai i scoles de pruma de Soraga e Poza che duc ensema, vidè da sia maestres, à portà dant la ciantia "I bec de l'Ercabuan", e risolan sia piccola bandieres ladines, con n bel grignot lumenous, à moscià la gaissa e la legrezza de



durèr chest idiom.

L projet é stat prejentà tel detai dai referenc de l'Olfed (Ofize Ladin de Formazion e Ennescida) Vigilio Iori e Roberta Dellantonio che farà pèrt del grop de lurier ensema ai esperc Barbara Gramegna, Fabio Caon e Barbara D'Annunzio de la Università de Unejia che arà n ruol de suport per i insegnanc e i genitores.

"L'é fondamentèl cognoscer più lengac - à dit l'assessora Dalmaso - l'esperienza del lengaz veicolèr la é dò che la se slèria fora a na vida positiva te n muie de scoles del

Trentin, l'é n strument n muie efizient, ma ge vel che duc sie pèrt ativa te chest prozess. Te la scola de Fascia se vel valorisèr n patrimoni che l'é jà, la scelta de insegnèr per ladin la é segur emportanta percheche la va dò l troi del plurilinguism per enjignèr joegn averc al mond ma leé a sia reijes." Da l'assessora Dalmaso l'é amò ruà la congratulazions per l'empegn metù en esser da la scola, ence per aer enjignà dut l material che vegn durà te clasc, ai insegnanc e ai genitores, co l'augure de n bel e percacent nef an de scola. (mci)